

জয়পুরহাটের এক মাদ্রাসার সবাই ফেল!

অনলাইন ডেস্ক

প্রকাশিত: ১৫:১৫, ১৩ মে ২০২৪



আক্কেলপুর সিনিয়র মাদ্রাসা থেকে কেউ পাশ করেনি

জয়পুরহাট জেলার আক্কেলপুরের একটি মাদ্রাসা থেকে এবার ২১ জন পরীক্ষার্থী পরীক্ষায় অংশগ্রহণ করে পাশ করেনি একজনও। রবিবার (১২ মে) বেলা ১১টায় ফলাফল প্রকাশের পর বিষয়টি জানা গেছে।

ফলাফল পর্যালোচনা করে দেখা গেছে, আক্কেলপুর সিনিয়র মাদ্রাসা থেকে এবার বিজ্ঞান বিভাগে ১১, সাধারণ বিভাগে ১০ জনসহ মোট ২১ জন পরীক্ষার্থী দাখিল পরীক্ষায় অংশগ্রহণ করেছিল। ফলাফল প্রকাশের পর দেখা যায় ওই প্রতিষ্ঠানের সবাই ফেল করেছে। এ ছাড়া উপজেলার কয়াশোবলা দাখিল মাদ্রাসায় ২০ জন পরীক্ষার্থীর মধ্যে মাত্র একজন পাশ করেছে।

আরও পড়ুন : সুদের চক্রে ফেঁসে বিষপানে জেলার শ্রেষ্ঠ শিক্ষিকার আত্মহত্যা

মাধ্যমিক শিক্ষা অফিস সূত্রে জানা গেছে, এবারের দাখিল পরীক্ষায় উপজেলার ৯টি মাদ্রাসার মোট ২০৪ জন শিক্ষার্থী অংশগ্রহণ করেছিল। এর মধ্যে ৪১ জন পাশ করেছে। আর সবাই অকৃতকার্য হয়েছে। মাদ্রাসা থেকে এ উপজেলায় পাসের হার ২০ দশমিক ০১ শতাংশ।

আক্কেলপুর সিনিয়র মাদ্রাসাটি দাখিল পরীক্ষার কেন্দ্র হিসেবেও ব্যবহার করা হয়। এর আগে, পরীক্ষা চলাকালীন ওই কেন্দ্রে উপজেলার কয়াশোবলা ও গণিপুর দাখিল মাদ্রাসার তিন পরীক্ষার্থী অসদুপায় অবলম্বনের দায়ে বহিষ্কার হয়েছিল।

মাদ্রাসার অধ্যক্ষ আ ও ম মোবারক আলী বলেন, ‘এই প্রতিষ্ঠানের সবাই ফেল করায় আমরা বিস্মিত হয়েছি। কীভাবে এই বিপর্যয় ঘটলো বুঝতে পারছি না।’

উপজেলা মাধ্যমিক শিক্ষা কর্মকর্তা জাবেদ ইকবাল হাসান বলেন, ‘আক্কেলপুর সিনিয়র মাদ্রাসায় ফলাফল বিপর্যয় ঘটেছে। কেউ পাস না করায় তাদের কারণ দর্শানোর নোটিশ দেওয়া হবে। জবাব পাওয়ার পর বিধি মোতাবেক ব্যবস্থা গ্রহণ করা হবে।’

উপজেলা নির্বাহী কর্মকর্তা (ইউএনও) মনজুরুল আলম বলেন, ‘ওই প্রতিষ্ঠানের ম্যানেজিং কমিটির সদস্যদের নিয়ে আলোচনা করে বিষয়টি খতিয়ে দেখা হবে।’
